



人事典第四十卷

六十一歲至七十歲部彙考

禮記 曲禮

人生七十曰老而傳

注

呂氏曰傳謂傳家事于子也

大

永嘉戴氏曰七十謂之老而猶與事接是

不知止也然人方其血氣之盛猶有所棄也及其既衰則顧戀不忍去雖家事亦然而況于國事乎此聖人所以戒之在得也

大夫七十而致事

注

致還其職事於君也

若不得謝則必賜之几杖

注

不得謝謂君不許其致事也如辭謝代謝亦皆却而退去之義凡所

以馮杖所以倚賜之使自安適也

行役以婦人適四方乘安車

注

疏曰婦人能養人故許自隨古者四馬之車立乘安車者一馬小

車坐乘也

自稱曰老夫於其國則稱名

注

呂氏曰老夫長老者之稱己國稱名者父母之邦不敢以尊者自

居也

居喪之禮七十唯衰麻在身飲酒食肉處於內

注七十之年去死不遠略其居喪之禮者所以全

其易盡之期也

王制

凡養老七十養于學

注學大學也

正義七十養于學者七十大衰養禮轉重故養于大學

七十貳膳

注

膳食之善者每有副貳不使闕乏也

七十時制

注

此言老則漸近死期當豫爲送終之備衣物之難得者須三月可辦故云時制

正義正年

轉老所須辦轉切也

七十非帛不暖

七十杖于國

七十不俟朝

注不俟朝者謂朝君之時入至朝位君出揖

卽退不待朝事畢也此謂當致仕之年而不得謝者

七十不與賓客之事

七十致政唯衰麻爲喪

注

致政事以其不能勝職任之勞也或有死喪

之事唯備衰麻之服而已其他禮節皆在所不責也

大

方氏曰齊喪之事猶及所以異于八十者

歟

內則

大夫七十而有閣

注

五十始命未爲甚老故無常膳七十有閣則有秩膳矣閣以版爲之所以庀

飲食之物

祭義

七十杖于朝君問則席

注

古者視朝之禮君臣皆立七十杖于朝據杖而立也君問則席謂君若

有問則爲之布席于堂而使之坐也

族有七十者弗敢先七十者不有大故不入朝若有大故而入君必與之揖讓而后及爵者

注先

謂鄉飲之席待七十者先入而後入也君與之揖讓而後及爵者豈族之三命得以先之乎

鄉飲酒義

鄉飲酒之禮七十者四豆

周禮 地官

鄉大夫之職以歲時登其夫家之衆寡辨其可任者國中自七尺以及六十野自六尺以及六十有五皆征之

秋官

司厲凡七十者不爲奴

訂義鄭鍔曰七十不爲奴老也

素問 上古天真論

丈夫八八則齒髮去

注數終衰極是以不惟頰白枯槁而更脫落矣

管子 入國篇

入國四旬五行九惠之教一曰老老六曰問疾凡國都皆有掌老年七十已上一子無征月有饋肉凡國都皆有掌病士人有病者掌病以上令問之七十以上三日一問

釋名 釋長幼

七十曰髦頭髮白髦髦然也

六十一歲至七十歲部藝文

詩

百年歌 錄一首

晉陸機

七十時精爽頗損膂力愆清水明鏡不欲觀臨樂對酒轉無歡攬衣羞髮獨長歎

代鄰叟

唐竇鞏

年來七十罷耕桑就暖支羸強下牀滿眼兒孫身外事閒梳白髮對殘陽

寄壽施煥伯七十

明吳寬

幼從鄉校託交遊束髮相看到白頭我媿濟南非伏勝人言吳下有施讎高懷已見開三徑遺愛猶聞在兩州少待登堂成一笑手持春酒獻還酬

新歲述懷

韓奕

白首坐中堂屠蘇最後嘗行年六十一非短亦非長眼昏字尙見脚軟策能將寒有衣加體饑有食充腸閒無官職繫貧無私債償懶惟居寢室健或到僧房卽死已多幸且活亦無妨

六十一自壽

陳憲章

世間甲子是何年母鬢雙幡子亦然十數曾孫羅膝下兩三杯酒笑燈前尋僧野寺花迷路吹笛江



門月滿船聖主萬年歌不足黃河清了鳳翩躩

六十一歲至七十歲部紀事

史記五帝本紀舜年六十一代堯踐帝位

韓子外儲說篇齊桓公微服而行于民間有鹿門稷者行年七十而無妻桓公問管仲曰有民老而無妻者乎管仲曰有鹿門稷者行年七十矣而無妻桓公曰何以令之有妻管仲曰臣聞之上有積財則民臣必匱乏于下宮中有怨女則有老而無妻者桓公曰善令于宮中女子未嘗御者出嫁之史記秦本紀晉既虜百里傒以爲秦繆公夫人媵于秦百里傒亡秦走宛楚鄙人執之繆公聞百里傒賢以五羖羊皮贖之當是時百里傒年已七十餘繆公釋其囚與語國事謝曰臣亡國之臣何足問繆公曰虞君不用子故亡非子罪也固問語三日繆公大說授之國政號曰五羖大夫說苑建本篇晉平公問于師曠曰吾年七十欲學恐已暮矣師曠曰何不炳燭乎平公曰安有爲人臣而戲其君乎師曠曰盲臣安敢戲其君乎臣聞之少而好學如日出之陽壯而好學如日中之光老而好學如炳燭之明炳燭之明孰與昧行乎平公曰善哉

晉語既殺厲公欒武子使知武子弑恭子如周迎悼公庚午大夫逆于清源乃盟而入辛巳朝於武宮定百事立百官年過七十者公親見之稱曰王父王父不敢不承

說苑敬慎篇魯有恭士名曰机汜行年七十其恭益甚冬日行陰夏日行陽市次不敢不行參行必隨坐必危一食之間三起不羞見衣裘褐之士則爲之禮魯君問曰机子年甚長矣不可釋恭乎机汜對曰君子好恭以成其名小人學恭以除其刑對君之坐豈不安哉尙有差跌一食之上豈不美哉尙有哽噎今若汜所謂幸者也固未能自必鴻鵠飛冲天豈不高哉鰲繳尙得而加之虎豹爲猛人尙食其肉席其皮譽人者少惡人者多行年七十常恐斧質之加于汜者何釋恭爲 成回學子子路三年回恭敬不已子路問其故何也回對曰臣聞之行者比于鳥上畏鷹鷂下畏網羅夫人爲善者少爲讒者多若身不死安知禍罪不施行年七十常恐行節之虧回是以恭敬待大命子路稽首曰君子哉

新序雜事篇昔者楚丘先生行年七十披裘帶索往見孟嘗君欲趨不能進孟嘗君曰先生老矣春秋高矣何以教之楚丘先生曰噫將我而老乎噫將使我追車而赴馬乎投石而超距乎逐麋鹿而



搏虎豹乎吾已死矣何暇老哉噫將使我出正辭而當諸侯乎決嫌疑而定猶豫乎吾始壯矣何老之有孟嘗君逡巡避席面有愧色詩曰老夫灌灌小子蹢蹢言老夫欲盡其謀而小者驕而不受也秦穆公所以敗其師殷紂所以亡天下也故書曰黃髮之言則無所愆詩曰壽胥與試美用老人之言以安國也

史記信陵君傳魏公子無忌者仁而下士魏有隱士曰侯嬴年七十家貧爲大梁夷門監者公子聞之往請欲厚遺之不肯受曰臣修身潔行數十年終不以監門困故而受公子財公子于是乃置酒大會賓客坐定公子從車騎虛左自迎夷門侯生侯生就車至家公子引侯生坐上坐徧贊賓客賓客皆驚侯生遂爲上客

後漢書禮儀志仲秋之月縣道皆案戶比民年始七十者授之以玉杖舖之以糜粥

東觀漢記馬援字文淵建武二十年武陵五溪蠻夷深入軍沒援因復請行年六十二帝愍其老未許之援自請曰臣尙能披甲上馬帝令試之援據案顧盼以示可用帝笑曰墨黠哉是翁也遂遣援魏志徐宣傳宣爲左僕射加侍中光祿大夫宣曰七十有縣車之禮今已六十八可以去矣乃固辭

疾遜位帝終不許

獨異志鍾繇年七十而納正室

晉書姚萇載記萇立社稷于長安百姓年七十有德行者拜爲中大夫歲賜牛酒

南齊書華寶傳寶父豪義熙末戍長安寶年八歲臨別謂寶曰須我還當爲汝上頭長安陷虜豪歿寶年至七十不婚冠或問之者輒號慟彌日不忍答也

魏書程駿傳駿遷著作郎爲任城王雲郾中令進箴于王王納而嘉之皇興中除高密太守尙書李敷奏曰夫君之使臣必須終效駿實史才方申直筆千里之任十室可有請留之數歲以成前籍後授方伯愚以爲允書奏從之顯祖屢引駿與論易老之義顧謂羣臣曰朕與此人言意甚開暢又問駿曰卿年幾何對曰臣六十有一顯祖曰昔太公既老而遭文王卿今遇朕豈非早也駿曰臣雖才謝呂望而陛下尊過西伯覬天假餘年竭六韜之効

李崇傳蠕蠕主阿那瓌率衆犯塞詔崇以本官都督北討諸軍事以討之崇辭于顯陽殿戎服武飾志氣奮揚時年六十九幹力如少肅宗目而壯之朝廷莫不稱善崇遂出塞三千餘里不及賊而還

畢衆敬傳衆敬爲兗州刺史徵還京師年已七十鬢髮皓白而氣力未衰跨鞍馳騁有若少壯篤于姻類深有國士之風

趙逸字思羣歷靈朔將軍赤城鎮將性好墳典白首彌勤年踰七十手不釋卷凡所著述詩賦銘頌五十餘篇

唐書張柬之傳柬之少涉經史補太學生祭酒令狐德棻異其才便以王佐期之中進士第始調清源丞永昌元年以賢良召時年七十餘矣對策者千餘柬之爲第一授監察御史遷鳳閣舍人

趙昌傳安南酋獠杜英翰叛都護高正平以憂死拜昌安南都護夷落嚮化毋敢桀居十年足疾請還朝以兵部郎中裴泰代之入爲國子祭酒未幾州將逐泰德宗召昌問狀時年踰七十占對精明帝奇之復拜安南都護詔書至人相賀叛兵卽定

珍珠船徐鉉黜邠州年七十手不釋卷精隸書寫許慎說文一帙

却掃編杜岐公旣致仕還家年已七十始學草書卽工

聞見後錄傳獻簡與杜祁公取未見石刻文字二本皆踰千言各記一本祁公再讀獻簡一讀覆誦

之不差一字祁公時年踰七十矣光祿丞趙樞在坐見之

東軒筆錄陳恭公初罷政判亳州年六十九過生日親族往往獻老人星圖以爲壽獨其姪世修獻  
范蠡遊五湖圖且贊曰賢哉陶朱霸越平吳名遂身退扁舟五湖恭公甚喜卽日表納節明年累表  
求退遂以司徒致仕

過庭錄忠宣守陳州黨錮禍起盡竄善類忠宣以救蔡新州爲論持正獨免時年已七十親識皆勸  
止之曰公年七十中外亦不責望得幸免何自苦如是公笑曰我受國厚恩備位宰輔合瀝血懇陳  
萬一感回上意所濟非細若忤旨竄謫蓋亦分也遂自草奏章命諸子緘封外人無知者章上卽爲  
行計未久謫隨州分子舍寄食許蘇二郡骨肉離別哭聲衆不忍聞忠宣蓋怡然自若也 范蜀

公六十三歲致政歸第後十餘年上欲起之者再三蜀公表謝云六十三而告老蓋不待年七十五  
而復來孰云中禮朝廷無以強之竟從其請

避暑錄話程光祿師孟吳下人樂易純質善爲詩效白樂天而尤簡直至老不改吳語與王荊公有  
場屋之舊荊公頗喜之晚相遇猶如布衣時自洪州致仕歸吳過荊公蔣山留數日時已年七十餘

荆公戲之曰公尙欲仕乎曰猶可更作一郡荆公大笑知其無隱情也

金史左泌傳泌性夷澹好讀莊老年六十一卽請致仕親友或以爲早泌嘆曰予年三十秉旄鉞侵尋仕路又三十年名遂身退可矣時人高之

琬琰錄馬溪田年七十歸隱于商山書院諸生問道者遠近踵集公山中野服鶴髮童顏望而卽之皆德容令色亦飄然仙風道氣

明良錄略宋濂以學士承旨致仕歸臨行賜緡幣及御製文集皇太子贈以衣三襲上諭曰朕最慎于賞予嘉卿忠誠故有是賜又曰卿年幾何曰六十有八上曰藏此幣俟三十二年後作百歲衣也  
六十一歲至七十歲部雜錄

筆記曾子年七十文學始就乃能著書孔子曰參也魯蓋少時止以孝顯未如晚節之該洽也

韋弦佩蘧公年五十而知四十九之非是武公年九十而思黃髮老之箴規予齒垂六十有七尙不知六十六年之猶未是也昏役無記豈不虛生方蘧太遲比武不早龐居士曰但願空諸所有切弗實諸所無吾以此爲觀察之資屠幽叟記

七十一歲至八十歲部彙考

禮記 曲禮

八十九十曰耄七年曰悼悼與耄雖有罪不加刑焉

注 呂氏曰耄昏忘也耄者老而知已衰雖或

有罪情不出于故故不加刑

王制

八十拜君命一坐再至警亦如之

注 人君有命人臣拜受禮也唯八十之老與無目之人爲難備

禮故其拜也足一跪而首再至地以備再拜之數

八十常珍

注 常食皆珍味也

八十月制

注 此言老則漸近死期當豫爲送終之備衣物之易得者則一月可就故云月制

八十非人不暖

八十杖于朝

大周氏曰八十與之杖老也而不免于朝者貴貴也

八十月告存

注 猶問也君每月使人致膳告問存否也大周氏曰月告存所以欲其生也

八十齊衰之事弗及也

注 及則旁有所加之謂以其老甚非特不能從與于事而事固不當及于



我矣

八十者一子不從政

大周氏曰一子不從政則老者有所養

祭義

八十不俟朝君問則就之

注不俟朝謂見君而揖之卽退不待朝事畢也就之卽其家也

八十九十者東行西行者弗敢過西行東行者弗敢過欲言政者君就之可也

注彼向東此向西

彼西行此趨東是相違而不相值然必駐行反迂謁而見之不敢超越徑過也

鄉飲酒義

鄉飲酒之禮八十者五豆

管子 入國篇

入國四旬五行九惠之教一曰老老六曰問疾凡國都皆有掌老年八十已上二子無征月有饋肉凡國都皆有掌病士人有病者掌病以上令問之八十以上二日一問

釋名 釋長幼

八十曰耄耄鐵也皮膚變黑色如鐵也

七十一歲至八十歲部藝文

詩

百年歌

錄一首

晉陸機

八十時明已損目聰去耳前言往行不復紀辭官致祿歸桑梓安車駟馬入舊里樂事告終憂事始  
題畫贈戚四丈八十

明程嘉燧

尊中有酒曾不留囊中無錢能不憂莫言八十漸衰老叱咤可走千貔貅相逢掀髯但一笑意氣尙  
欲橫九州少君十年慕禪寂吟詩北牕歎何益老手猶堪戲貌君碧瞳爛爛霜髯戟

八旬屏居辭賀

蔣顥

早忤奄臣返故廬春秋屈指八旬餘百年苦節甘株守一片冰心任取攜過目幾經寒暑變留心長  
對聖賢書還思罔極恩難報每遇生辰輒屏居

七十一歲至八十歲部紀事

韓詩外傳文王舉太公于舟人而用之年七十二薨然而齒墮矣

莊子知北遊篇大馬之捶鉤者年八十矣而不失豪芒大馬曰子巧與有道與曰臣有守也臣之年二十而好捶鉤於物無視也非鉤無察也是用之者假不用者也以長得其用而況乎無不用者乎物孰不資焉

史記申公傳趙綰請天子欲立明堂以朝諸侯不能就其事乃言師申公于是天子使使東帛加璧安車駟馬迎申公弟子二人乘軺傳從見天子天子問治亂之事申公時已八十餘老對曰爲治者不在多言顧力行何如耳是時天子方好文詞見申公對默默然已招致則以爲大中大夫

漢書劉辟彊傳霍光擇宗室可用者辟彊子德待詔丞相府年三十餘欲用之或言父見在亦先帝之所寵也遂拜辟彊爲光祿大夫守長樂衛尉時年已八十矣徙爲宗正

後漢書胡廣傳廣代陳蕃爲太傅總錄如故時年已八十而心力克壯繼母在堂朝夕瞻省傍無几杖言不稱老及母卒居喪盡哀率禮無愆性溫柔謹素常遜言恭色達練事體明解朝章雖無害直之風屢有補闕之益

吳志呂岱傳岱年已八十然體素精勤躬親王事奮威將軍張承與岱書曰昔旦爽翼周二南作歌